

COMMUNICAZIUN A LAS MEDIAS

Claustra, ils 25 da settember 2026

Madrisa Solar: Gia la mesadad da l'implant vi da la rait

Madrisa Solar producescha gia electricitad cun radund 10'000 panels solars. La fin da settember è pia la mesadad dals totalmain radund 20'000 moduls planisads montada e colliada cun la rait. Ina part da l'electricitad producida nizzegian las pendicularas Claustra-Madrisa e la vischnanca da Claustra directamain al lieu. L'ulteriura energia retira l'EKZ e dovra ella per proveder sias clientas e ses clients.

La segunda e pli gronda etappa da construcziun da Madrisa Solar progredescha bain, la mesadad da Madrisa Solar è gia vi da la rait. Ils radund 10'000 moduls solars bifazials montads correspundan ad ina prestaziun da moduls da stgars 6 megawatt-peak. «Nus essan cun las lavurs da preschent levamain avant l'urari. Perquai essan nus da buna speranza da cuntanscher nossa finamira per la segunda fasa da construcziun e da pudair colliar enfin la fin da november almain 70 pertschient da l'implant vi da la rait», di Fabio Maurizio, il manader dal project Madrisa Solar tar Repower.

Las lavurs da construcziun han cumenzà uffizialmain ils 4 da zercladur 2025. La cumpletta messa en funcziun da l'ovra solara è prevista per l'atun 2027.

Ina colliaziun a la rait rinforzada per la producziun creschenta

Cun engrondir l'implant solar è era vegnida rinforzada l'infrastructura per l'alimentaziun da l'electricitad. Ina gronda part da l'infrastructura da rait necessaria era gia pronta avant il cumenzament dal project. La primavaira 2026 han ins rinforzà supplementarmain la colliaziun tranter Madrisa e la serenera da Claustra.

L'electricitad producida sin Madrisa vegn duvrada directamain al lieu da las pendicularas Claustra-Madrisa e da la vischnanca da Claustra u integrada en la rait da distribuziun. L'EKZ retira l'electricitad che na vegn betg duvrada al lieu. «Madrisa Solar metta a disposiziun electricitad solara indigena supplementara per il provediment da nossas clientas e noss clients e rinforza uschia la segirezza dal provediment - cunzunt l'enviern», di Jonathan Beyli, il manader dal project Madrisa Solar tar l'EKZ.

La producziun d'enviern surpassa las spetgas

Ils resultats cuntanschids fin uss conferman ils avantatgs d'implants solars alpins. Cun dapli che 40 pertschient succeda ina part impurtanta da la producziun d'electricitad durant ils mais d'enviern, cura che la Svizra è spezialmain dependenta da funtaunas d'electricitad indigenas

supplementaras. Madrisa Solar è concepida consequentamain per ina gronda producziun d'electricitad d'enviern. Grazia a l'autezza, l'alta irradiaziun dal sulegl, las temperaturas fraidas e la reflexiun da la naiv contribuescha l'implant cunzunt durant ils mais d'enviern fermamain al provediment d'electricitad. Gia l'emprim enviern ha l'implant en il Partenz produci dapli energia che prognostitgà.

Di dal plazzal avert ils 3 d'october 2026

Sonda, ils 3 d'october 2026 avra la Madrisa Solar SA il plazzal per la publicitad. Durant las visitas guidadas, che han lieu cuntinuantamain tranter las 11.00 e las 15.00, survegnan las visitadras ed ils visitaders in'invista en la planisaziun, en la construcziun ed en il manaschi da l'ovra solara alpina. In'annunzia n'è betg necessaria. Il plazzal è cuntanschibel davent da la staziun da muntogna da las pendicularas Madrisa en radund 30 minutas a pe. En cas da trid'aura n'ha l'occurrenza betg lieu.

Infurmaziuns pli detagliadas davart il project ed in film davart l'istorgia da success da Madrisa Solar èn da chattar sin las paginas-web da [Repower](#) ed [EKZ](#).

Madrisa Solar en furma concisa

Madrisa Solar vegn realisà sin radund 2000 meters sur mar en il territori Züg sur Claustra en il rom dal Solarexpress federal. L'implant solar alpin cumplet vegn a disponer d'ina prestaziun installada dad 11 megawatts peak e duai producir mintg'onni radund 17 uras gigawatt electricitad - bunamain la mesadad durant il mez onn d'enviern. Planisadas èn radund 3170 maisas solaras cun var 20'000 moduls solars bifazials sin ina surfatscha brutta da radund 150'000 meters quadrat. Patruna da construcziun è la Madrisa Solar SA, a la quala l'EKZ, la vischnanca da Claustra e Repower èn participadas per mintgamai in terz. La messa en funcziun cumpletta è planisada per l'atun 2027.

Contacts

Repower AG
post da medias
t +41 81 423 77 00
medien@repower.com

EKZ
post da medias
t +41 58 359 52 55
medienstelle@ekz.ch

Vischnanca da Claustra
chanzlia
t +41 81 423 36 00
info@gemeindeklosters.ch

Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valorisaziun da l'electricitad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.

EKZ

Las Ovas electricas dal chantun da Turitg EKZ èn ina da las furnituras d'energia las pli grondas da la Svizra e provedan var in milliun umans a moda fidada cun forza electrica regenerabla per 100 pertschient. Las var 1570 collavuraturas e collavuratur da la gruppa EKZ s'engaschan per in avegnir energetic persistent: cun amplifitgar l'energia eolica, idraulica e solara e cun porscher tecnologias smartas sco pussaivladads da chargiar per l'electromobilitad. Las EKZ planiseschan, construeschan e mantegnan ina rait electrica da prest 17 000 kilometers lunghezza ch'è disponibla surproporziunalmain cun 99,998 pertschient. Da la clientella da las EKZ fan part personas privatas, interpresas ed autras furnituras d'energia svizras. Sco ina da las interpresas d'emprendissadi las pli grondas en il chantun da Turitg scoleschan las EKZ 155 specialistas e spezialists en diesch professiuns cun emprendissadi.